



答霍南溟

人世浮榮誠如泡影天性至愛乃爲真樂不佞上有
老母盼盼倚閭下有八兒熒熒在抱苦莫苦兮日隔
樂莫樂兮相依候代無期守株何日業已束裝移駐
行且冒罪人關矣倘從揜斥實遂歸休而乃以小人
之心度君子之腹竊意台臺戲綵弄雛之樂觸藩羸
角之苦亦必有下同于不佞者具疏代懇但知爲台
臺計而不知爲地方計罪矣罪矣台臺不以爲罪而
以爲知己之言所謂他人有心予忖度之者耶小詩
二章欲當唱書之行卷置之箴中久矣茲未敢呈姑

上國集 卷二十三 三
俟異日馬首東去可任馳依

答吳玉田

不佞疎節直腸似謂無當于世而門下真心勁節若有合于臭味之投者相與數月辱道誼之愛不可名言適接上署院孫老先生書尤見曲全至意感刻感刻不佞拮据勞苦一年有餘不意臨行遭此困阨命之窮也夫復何尤前承教先告署院而後可行誠爲周慎復念告則不得行不行則事多掣肘况臺員匱乏見有九差無人可駐豈復有來代者遲與速等去耳與其遲而終無代期孰若速而早離苦海乎至于

署院或諒其不得已之情而姑從薄罰惟門下之賜卽不然而降調之擯斥之適遂不佞還山之願亦甘之如飴矣行期已定行意已決未審再得一晤以罄縷縷之衷否

與薛青雷

不佞罪孽積逾進退狼狽欲行則明旨宜候欲止則冊揭已發擅離任固不可久戀任尤不可况直言多忌漏網難容勢不可留義不可辱又不佞所當早引決耳私情未敢據陳正欲開續陳之路若但請旨復命而不請告乞歸人將謂不佞急弛擔負覲入國門

則病疏萬不容已于今早馳奏昨具稟署院蒙許題
疏下另爲酌覆或有放生之機若潘兄之來否可存
而不論矣總之徘徊顧慮只爲一官畏路榮途一了
百了又何三尺之爲拘拘也仰恃台臺骨肉之愛輒
布狂言端使見存勒之五內倘有高明之見幸終惠
教以牖顛愚固所願也

與王衷白

昨者不揣卑迹僭易奏記重辱還答拜而迴環驚喜
過望茲啓不肖叨役已竣逢時不造讐尤叢集病詬
交侵事勢兩難督撫司道皆知之而衷情萬苦非骨

肉懿親不能悉不敢告也屢陳疏揭已蒙總憲孫老
先生十分體恤然猶未慨然允放第曰姑徐徐云爾
夫不肖今日非敢懷希榮干進之心又非敢辭畔官
溺職之罪但欲求一去而已求一早去而已似亦可
俯從者鬱鬱杜門以日爲歲思親痛子必發狂疾台
臺元化在手大生爲心或有一夫不獲之念輒敢披
瀝乞鼎言于總憲特發慈悲早爲裁奪不肖死且不
朽夫台臺位尊禮絕不肖交淺望深誠不自量然亦
計無復之不得已而哀鳴于仁人之側冀其萬一之
援手也

答薛青雷

以下歸田

不孝其狂顛多尤澄清寡效既揣不諧于流俗輒甘
自擯于長林然亦戀母懷歸棄官扞罔不虞罪孽深
重禍延先慈甫及周星倏焉見背君親兩負忠孝全
虧若不孝者豈可復容于覆載之間哉惟有泣血待
盡而已台臺望重三陲名馳四裔旂常鍾鼎之業社
稷是毗且聞虜封有期足慰聖明西顧崇階特眷更
當游膺三錫晉登八座矣而于戎務倥傯中猶然垂
注淪落之畸人孤窮之孽子也吊奠遠及恩哀備隆
真所謂一貴一賤乃見交情者乎三獻三號敢諉明
德第未知銜結之報在何時何地耳

又

憶不孝將入關時荷蒙台臺勤勤勉留若將拯之陷
穿休戚之誼等于骨肉不孝卽有胸無心敢不悚佩
然使不孝而稍爲濡滯貽老親以倚閭之憂卽竭蹶
歸子舍而不能從容躬湯藥親含歛雖牲鼎在列今
且謂何此不孝所爲三公不易九死靡憾者也不孝
與世多忤罪狀自知立仗之鳴不斥不已然使不孝
而稍有沾戀視一官尚可瓦全冀燃餘燼又何必飄
然掛冠忻然接浙不俟終日乎此又不孝所爲三黜

自甘一往不返者也君平棄世而後世乃棄之無足
怪矣過辱言存不覺吐露山林狂態惟台臺一笑置
之

答葉二菴

不肖迂戇不識忌諱疎庸無所建明惟是知止知足
不諂不驕素奉教于君子矣昨者偶有感觸颺然掛
冠當入關時業已置弁沉榮辱是非毀譽于度外彼
鷄肋何足以縻我腐鼠何足以嚇我乎此等見解無
論俗人不識卽素稱有道之士恐未能窺不肖之藩
養冲丈曾述老表伯云云先已付之一笑矣不肖歸

來無日不接客但不接俗客不接貴客耳且遠出乍
歸母子啾啾昏定晨省之外或偕諸昆或携幼子棹
孤舟挈棋枰徜徉笑傲于郊坰林野之外若必欲守
一室候重門效世俗倒屣拂座格套有所不能此則
承顧失迂之罪不得自文者也台教實獲我心敢不
拜賜秋風漸爽容躬叩草堂劇談農圃之事卽寒暄
塵全之語諒老表伯所洗耳不欲聞也小刻附呈亦
可先當一面并致友人書一章欲令達人知吾心耳

答劉本如

弟戇直迂疎原無逢世之具兼以母老子幼福薄量

上國集 卷二十三 三
盈偶有感觸甘心引退其于烏鳥之私鼯鼠之分等
之審矣乃若少長道鄉稍知嚮往或不貽正人君子
之辱所謂蓬生麻中者乎歸里杜門傾想高誼顧蒙
垂念良用生色惟是始終提誨俾不墮落朝聞夕死
又何憾焉此亦拂衣修初服之微尚也

答薛玄臺

弟嚮道之心甚切棄官之意謂何況辱涇翁接引再
三敢不潔已以進奈兒病沉綿無母何恃日理醫藥
旦夕憂惶未能頃刻拋捨且弟林居之日正長請益
之期有待若曰人以藉口依附見諂而姑爲是次且
聞鄉鄰之事久矣并此復

答宋別駕

敝邑縉紳不能治生且不敢玩法故富厚鮮有而花
詭絕無卽有應當差者今年見役恐難紛更來歲改
僉自宜斟酌太尊之意正獲上治民之大道也老公
祖以有事行其無事以新政付之新官或亦人情政
體所宜然要非以難遺後人也辱垂問敬陳鄙見不
識高明以爲何如

與鄒南臯

不肖不能仕又不能學天壤間棄人也顧不見棄于大君子之門時勤誨諭若越千里而提命之喜可知也郡志新成殊未愜輿望不得已有人品記之作若遜世一編用表微尚而已敬因便羽附呈裁正向辱台翰兼拜大章義莊當藉以不朽謹西嚮九頓以謝

與鄭明初

不肖弟戇直迂疎寡諧于俗惟是二三兄弟氣誼相收至與令兄尤爲契厚以肺腑相託者也今春令兄忽有出世之想遂爲駭世之事弟始而羨之旣而疑之又旣而惜之他有喜談樂道者弟不敢隨聲卽有

忠告善道者弟未敢錯趾蓋謂偶爾眩惑旋當醒悟至于幃闥啓釁栝棧失恩絕不關聞毫無干涉詎意疑忿日深禍延不肖雖其說甚怪誕甚鄙俚不足置之齒頰而以肺腑相託之親猜以骨肉相殘之行其間構鬪實藏機械又似稍有根因不可測識者不肖弟不難引決永絕高門消此夙業而尊翁年伯明見顛末無俟湔雪故隱忍而至于此適辱仁兄手教猶以一體相關兩情莫逆嗟嗟弟卽有胸無心何敢忘賢橋梓如天之誼乎哉惟是令兄之疑不釋淫人之計不寢當更有不可測識者如何如何若仁兄倚關

山園集 卷三十三
手足雖抱隱痛身膺民社豈容息肩歸來之說萬萬不可萌此念况覲期在即奉尊慈爲畫錦游且有日乎適晤錢啟老云不惟不可亦不必想尊翁亦必力止仁兄無疑也積有不平之感遂申無諱之衷統恃仁慈特賜鑒在

與劉府公

蔣氏之事弟初謂世禎宜一處者因其亦在倫序之中又當貧病之際而吳婺堅執不從故欲少借威靈易爲調停耳昨承台命與諸親友商議及查律例所載繼子不得于所後之親聽其告官別立又立所親

愛不許宗族指以次序告爭則世禎于法不得立而妻父憲副公有親筆遺囑極恨世禎防其構訟則世禎于情又不得立而弟爲世禎之初念于是乎窮矣萬不得已曲處五十金稍調其乏而世禎偶聞德意遂起貪心弟再三諭之畧不見聽此丘氏之所以復有詞也弟謂承嗣者欲受人之產業必與所後之生者死者有一毫情分而妻父視世禎如盜賊吳婺視世禎如寇讐必欲以田房處之生者豈能甘心死者豈能瞑目弟雖欲強吳婺以曲從而必不忍負妻父于冥冥之中也謹以近日議單并向年遺囑錄呈台

覽老公祖倘不以弟言爲謬乞賜採擇仍拘面審先
決斷以杜其爭而或量處以厭其意則官法與家法
並行人紀與人情兩盡弟亦可以不召兩家之怨無
負九泉之知而老公祖所以保惠不肖弟者卽九鼎
百朋不足爲重矣伏承再諭直披悃誠毫髮有私天
日爲鑒

上萬府尊公書

竊聞皇甫氏云世有不能已之情而後有不得已之
言故仁人之門不拒浚恒之求于命之請所以廣先
容之路達幽隱之衷也生等素守固陋于一切公府

之事不敢僭易陳說而今有情不能已言不得已者
合詞上懇惟仁臺一垂聽焉訪犯董某憲副某之孫
蔣某憲副某之子也論世皆縉紳之裔居鄉無睚眦
之嫌而四壁徒存甘心落魄一經尚在妄意埋頭詎
料孱弱之豎儒忽遭窮奇之慘禍若云自作之孽釁
實無因或者天降之殃命虞叵測闔門逃竄通邑驚
惶夫使世祿之家果自踰閒而滅義則執法之宰何
難引繩以批根惟此二孤罹茲三尺又乍見孺子之
危所爲怵志凡從大夫之從無不寒心者也伏乞仁
臺洞燭覆盆弘施解網十世在宥俯憐簪履之遺九

山園集 卷二十三
死迴生仰荷悒悒之造卽尼父之矜治長郭公之廉
孟博何以加諸方斯蔑矣嗟嗟訪察之法所以待元
惡戢巨奸也邇來造訪公行無辜濫及非賣菜傭必
守財虜耳一經捕逮立見覆亡行道之人皆爲扼擊
仁臺明並日月威肅雷霆當使魍魎獻形檮杌屏跡
此亦萬代所瞻仰而生等尚有所囁嚅未敢深言也

與劉太尊

巷詠塗歌蛙鳴蟬噪乃至動居高之聽虛盡下之懷
驟驟無知芻蕘忘忌罪不容于誅矣先君一節自矜
高死不悔得列郡乘敢不銘心但于節義之中又附

建言之欵豈建言不足以當節義乎抑建言者自附
于節義乎別立名目似覺駢梅王吏部就學雅好清
修共推廉幹驗糧典禮以及司銓革常例革班銀皎
皎不污彰彰可述忽爾削籍實忤當途若攀送梓宮
一疏是其末節未受奇禍附之建言非其倫矣薛憲
副應旂理學節氣悉有足稱縣誌列之文學其孫敷
政敷教嘖有後言幾于削木善乎顧光祿之原草畧
以類從不爲品限庶幾無獎抑見靡爭矣大抵此事
必非一手之力亦非一蹴可成雖戒築舍之謀宜廣
合宮之察台臺以爲一郡之史而操管者以爲一家

之書孔作春秋未聞爲叔梁紇立傳若乃錢糧徭役
難紊毫厘水利兵戎實關沿革成書旣布明例永垂
又非可草草從事者也雖然位卑而言罪矣成事而
說贅矣猥承下問敢布其區區如此

余偶作園居詩劉公見之謂有
意于郡史移書見詢遂有此答

崇祀先賢公書

郡國祀鄉賢所以崇德也維風表俗典其綦重矣晉陵
祀先賢所以明道也開來繼往義有取焉故非此科
不必並進非其人不得濫入又當參之士論質之公
評者也敝邑錢啓新先生

聖代圭璋人倫冠冕

在 朝廷則侃侃危言削籍而不辭居鄉黨則恂恂
厚德循墻而罔越臣言忠子言孝家示儀刑田讓畔
行讓塗俗成揖遜賑貧折券待舉火者百家倡義施
棺獲就木者千口益孳孳而爲善非皦皦以殉名事
大夫于邦無以尚矣祭先生于社有何忝乎若廼闡
明聖學興起人文緒纘濂溪統承伊洛析義利公私
之辨探身心性命之微注易象衍範疇抉千聖不傳
之秘溯道源沿儒滙開一宗不二之門羅萬象于心
胸振六經之羽翼寢無愧衾行無愧影徹夙夜以兢
兢口不絕吟手不停披窮歲年而矻矻初終一節表

裏相符崇正闢邪奉王文成再接西江之脉考德問
業偕顧光祿狎主東林之盟世或效羣犬之吠聲公
獨抱潛龍而無悶流行坎止存順沒寧都講取斯曾
見諸生立雪受靈傳是當令百世聞風况合俎豆于
澤宮茲實權輿乎秩典理宜叅伍議實僉同昨聞邑
文學之公呈特荷縣父母之詳勘生等未窺學閭曾
側講堂既目擊而道存皆首肯而論定此外冠紳相
望未敢因藉爲援其他衣鉢未真何敢阿私所好此
又合詞之本意從祀之公案也伏祈俯採并賜轉申
斯道幸甚斯民幸甚

答公周庭

齊山吳水渺渺各方怒如之懷曷可云喻丁巳之春
聞仁兄幾爲左右手所中暫養時晦以避狂氛乃長
公忽不少延天何奪之酷也家弟龍溪令以不獲上
掛冠歸今夏五亦遂棄世人琴之痛正難爲情視仁
兄更有同病之憐矣純所亦自粵東返初服此賤兄
弟拙宦之明效也惟是不肖弟泉石之癖已痼膏肓
魏闕之思杳如夢寐聊從負郭別構小園稍圖偃息
以畢此生但覺天地之闊日月之長而不知風波之
從何處來也東事決裂未知稅駕漏舟敗屋薄海皇

皇違之一邦亦復如是近憂遠慮此又高明之士宜
擇地而蹈之時矣敝鄉小小田宅時時有之但不知
仁兄所需應若干金之產必欲卜居更須相時成事
正未可踰度也仁兄倘肯命呂安千里之車第亦何
難虛公孫一區之宅耶幸決早計以慰勤思勿終託
之空言也

止園集卷二十三終

止園集卷二十四

延陵吳亮采于甫著

憲約

爲摘要約以便遵守事

照得本院猥以菲材叨茲重鎮不習爲吏何知觀民
矧當秋比歲閱之期兼有衡文振武之責日夕飲水
惟弗克肩是思所有應行憲務具載巡方總約者業
已犁然而時久則今昔宜通地殊則邊腹宜審案牘
可覆管見偶窺畧約三章聊攄一得願地方同事諸
賢督率文武將吏實心遵守加意振刷本院且藉手

以冀澄清于萬一矣

一重官評夫致理莫先于察吏知人卽所以安民行部激揚賢否爲急本院哲未能周而愚不自用惟是託心膺于道府不能寄耳目于旁蹊恃諸君子之不誤本院而已否則有近例連坐之典在

一咨民瘼夫天下風俗不同凡人知識有限况于邊地之瘠寒本院之寡昧乎如有見聞不妨陳告至于職掌所在尤宜條析詳明卽在冗秩卑官本院且爲聞善之拜矣

一稽公案夫詢事必期底績率作惟在省成矧缺差二年積案千計倘不立法稽考安能依限完銷各衙門奉到事件務須分別緩急着實勾稽毋憑吏胥浮沉以致延閣卽有事重未結年久難完者亦須明白申報以便奏請開除不然考成之罰誰執其咎

一戒冗費本院素性澹泊自甘况于邊陲凋疲尤甚不能爲地方造福何忍以口體累人坐飯毋過五肴中火止備一點已經揭示自合遵行或不相諒而復加繁縟所至驛騷是輕百姓力而

以本院爲貌言也少一事省一事之費多一分損一分之福願諸賢深體而共勉之

一諭有司邊方已極苦寒軍民頗知守法各官須愛養休息無得密罔苛求撮其大者與各屬約刑法不可濫施詞訟不可濫准錢糧不可加收罪名不可多問科罰不可妄行發落不可遲滯佐貳不許受狀待百姓不可不寬待衙門不可不嚴負此約者定以三尺從事

一諭府佐各路各廳之設原以稽覈糧餉撫恤軍民而弊習末流間有視爲奇貨因之染指者將領何觀邊事奚賴今後各官務須自愛諸將有餌慎勿吞之厥或不臧白簡具在

一諭佐貳首領驛遞倉庫各官爾等自分前途有限多只苟且一時不知大小總是命官何苦不自愛惜前程得之甚難一筆勾之甚易近時佐貳等官多由空選貲本已奢或係效勞機關更熟誅求無厭放肆無忌莫此爲甚而此輩與民最親害民尤烈一方群虎百姓何堪今後如有不遵禁約貪酷縱橫者告發訪聞責戒拏問決不姑息道府尤宜加意廉察從實揭報此亦澄

清第一義也

一諭教官各官出身正途誦法先聖每以日暮途遠或至倒行逆施名爲師儒何自菲薄各宜正已表率盡心勸課卽邊方人文稀少務要因材作養更須鈐束諸士毋令出入公門武斷鄉曲方爲稱職至于修脯贄儀尤宜崇尚雅道德行文學經師人師于各官有厚望矣

一諭王官

代府親藩諸宗

帝胄本院叨奉

簡命但知展親况有賢藩檢束諒無扞罔但蕃衍不無敗群左右或多揆置長史教授等官須

仰體賢藩德意訓諭諸宗毋少軼蕩以干三尺至于祿糧等項尤須及時足發以資養贍不許遲延及用厚紙重糊等弊諸王官且視此爲殿最矣

一諭將領將官剝軍只今視爲常事不知士卒與將真如手足平時不能恤其饑寒臨陣豈能得其死力如謂欸貢已久敵愾無庸而封事未成虜情叵測太倉額餉旣不以時給發各營將領必當加意撫綏至于世職之家尤宜恤軍自愛思祖宗枕戈擐甲留此世廕以貽子孫乃今日

美食華衣剝彼窮軍以資享用既罹國法益墜
家聲本院雖持文墨寧薄武弁但撓三尺必不
能曲貸耳慎之慎之

一禁差役本院官承止備差遣供奔走豈有上人
寄耳目于下人之理又豈有容下人逞威福于
有司之理往聞各處差役縱橫放肆備極克頑
驛遞卑官受害尤甚如有能指名密揭報院者
定行究治決不姑息而本官風力可嘉定行優
處以示風勵

一禁游客京師山人墨客多求書啓游行邊塞而
宣雲密邇尤易往來武弁無奈情分科歛餽遺
稍不厭心復肆謗毒本院疾首此風不難爲諸
將任怨今後各守口將官不許縱容一人闖入
或有潛行託宿者各官卽時揭報以憑驅逐容
隱不舉一體根究治罪

一恤驛站兩鎮往來接遞多係戰馬軍兵疲繭損
傷不虞何賴至于派撥鄉夫尤爲白役苦累今
後應差遣者務須加意節省不應差遣者不許
徇情應付文武衙門人等但有索要折乾恤馬
等錢及走傷頭畜者赴院呈告以憑追賠違例

枉道擅馳遁者查出定行拏究

一恤罪囚兩鎮地方軍民愚悍動因小事赴院與詞及批發問官無論貧富槩擬有力得罪之人有爲贖緩變產者有因紙價揭債者一朝之忿負累經年殊非本院哀矜庶獄之意今後問官所擬有力無力俱聽本犯自己招認大都以開釋免科爲主本院因不藉此錙銖以敲民之骨髓也各官自審詞狀亦宜深體痛懲留有餘以還百姓或亦積德施仁之要乎倘有濫科定從劣處

一驗市貨國家羈縻虜酋惟是市賞一節各官鑽求領買任意侵漁以致貨物粗惡夷人藉口殊爲可恨今後須擇廉明有聲者差委貿易貨到之日仍聽本院不時盤驗如有央求囑託希圖領買取利致悞市賞者重治不宥

一慎防範宣大兩鎮與虜爲隣方今款和夷人領賞買貨出入內地居處城堡軍民結識視爲奇貨夷人投餌巧于窩藏潛聽消息游行街市我之動靜彼無不知我之道路彼無不熟倘有他覺寧無隱憂昨據獨石議修月城安插夷人良

亦有見各該市口邊堡及鎮城俱有夷人討賞
行住去處如進城止許由一路行走從一門出
入仍令通丁人等把口跟押併諭住夷店家不
許交通窩藏倘致失事責有攸歸應議處者通
詳呈請

一清占役營伍之蠹私占爲多蓋奸軍每投勢宦
及聽用武官作爲伴當名色而管軍官擅將所
部派撥分送名曰雜役每月扣除糧銀名曰買
閒納辦彼利有人此利有餉操演久缺營伍盡
虛宿弊積習牢不可破今後但有占役納辦軍

丁盡數撤回入營隨操如仍前不悛許諸人許
告坐贓重處

一清冒糧兩鎮官軍數十餘萬各有糧額事久弊
生事寄空名糧無實數且如一官陞遷必有隨
任家丁數百信憑自報照數關支及遇點查多
屬雇倩又有逃故軍丁不卽呈報按月冒支又
有將逃故雙糧軍士止給單糧以補餘糧抵克
私用近該戶部楊查究龍門衛詭冒情弊延捺
不報此類甚多法應稽核該道嚴諭軍官除已
往不究外今後軍士務要正名實數糧銀不許

虛冒重支一切宿弊悉行查革本院巡閱簡核
倘有訪聞或被訐告罪不爾貸

一清屯租查得贍軍屯地給軍有數兌糧有數責
印屯等官徵收以完欠多寡爲殿最不無掩飾
叅罰以一地而兌兩軍之糧有將本軍遺地召
人承種旣收其租又扣其糧甚有管屯百戶擅
將地租軍糧不奉批呈任其昂抑或侵收使費
或藉名拖欠或那移頂補情弊種種今後須設
法清理其地有租不必扣糧有糧不必收租至
于扣糧分數先呈該管衙門明註某人應扣某

年分屯糧銀若干計數登簿照數扣除不得仍
前侵收混扣致滋弊孔

一清牧地宣大兩鎮皆有牧馬草場先年邊警頻
仍俱附郭牧放便于傳調自欵夷歸馬趨草遠
放所遺牧地率多耕墾盡成肥饒有量行起科
者有指初墾無糧者有被勢豪侵隱霸種賄囑
打點以多報少以有作無者近且爲奸弁妄稱
閒田徵收籽粒屬之稅監進奉矣夫 聖明

停稅有日一旦蠲還兩鎮以資牧放固可翹跂
待也獨無奈勢豪積蠹牢不可稽耳近經撫院

連查出牧地數十頃明立界石以防侵占殊費苦心而其未經查出者尚多也各道能仰體此意用法稽查或許諸人呈首則塞淵不虛而驟牝其有賴乎

一查堡寨城堡之設所以保障居民邇因烽火不驚民多散處山谷岩墻坍塌村落荒涼而各鎮畫圖列障粉飾丹青具數報修開銷錢穀卽有頽垣敗壁間焉無人名存實亡緩急何賴本院歲閱在邇寧厭周巡各道預查所轄宮民城堡各若干除堅修固守外但有傾圮速令繕修如

果工力浩煩不妨申請區處限一月內造冊呈報此亦未雨徹桑爲地方長久計也

一墾荒地兩鎮荒地甚多開墾未廣蓋因畏避起科加差帶徵舊負以致民不盡力地有遺利深爲可惜矧今邊事久謐生息日蕃招撫開荒誠目前首務也各道督率司府州縣衛所掌印官揭諭遠近流移土著軍民人等將空閒無糧荒地聽其盡力闢治給與優免印票永不起科本管官里不許追索舊負坐派雜差每季終將墾過數目收過戶口造冊呈報本院將此考驗實

政慎毋視爲泛譚。

一嚴捕盜兩鎮軍民雜居盜賊潜伏劫竊時有巡捕爲何今後捕盜官兵將所守信地分屬晝一晝夜巡防遇有盜賊生發併力擒拿有功照例給賞官仍紀錄但不許指賊嚇詐生事害人及剋留盜賊受賄賣放每季終該道將地方提調巡捕員役失事次數及曾否捕獲名數揭報如三次無獲各員役招解掌印叅處有隱匿不報及報不以實者訪出一併叅究

一禁窩訪本院職司彰瘡間有訪拿原爲衙門奸胥地方豪惡而設乃兩鎮各廳路多有窩訪人役一經委託四出詐騙元兇漏網反將一二猥瑣暗陷塞責或挾讐肆毒羅織坑砌殊可痛恨今後各官務要留心體察不得委任積猾尤不許干連人衆貽累無辜如解審誣枉決要根究原報之人從重坐罪

一恤行戶官價之名深爲民害各衙門及首領等官每用貨物不給現銀率以票帖賒取遲至數月或給半價及至領價又有吏書門皂使費以致闐闐咨嗟折本罷市更有買辦員役指官私

用者今後各衙門俱要先給現銀責委嚴實員役兩平交易毋虧小民仍置簿將職過物件有無給銀登記明白送查

一蘇民累宜鎮召買糧草先係委官領銀收買近來攀及街市鋪戶多致賠累傾家自後仍前選委職官領買不許攀累街民但米豆亦須依時估價不得減少以累委官如有收受勒索者告究

一蘇軍累宜大兩鎮營路軍丁凡有倒死馬匹合營攤派不足本軍包賠及至到官估驗印烙務爲減削以致苦累有鬻賣妻子傾家喪命者殊爲可憫前院湯曾經查處該道覆議終屬具文竟無長策惟是稍爲通融別求津貼或亦甦息貧軍之一端也

一崇學校士類矜尚名節砥礪貴嚴官司愛惜人材培養宜亟故士行毫不可渝而士氣亦不容挫也除諸生有越禮犯分喪檢敗羣者訪實另行究黜外其或被入告訐或因事干連非奉本院批詳不許擅自勾攝槩從淹禁卽係大逆重辟亦須一面拘候一面申呈各衙門招擬報允

之日仍詳本院批准除名蓋廣厲樂育不妨並行而本院視學觀風實所兼攝故于欵末尤致意云

學政

爲學政事照得幫增舊例必考居一二等者方許申詳而邊地少文科舉數窄諸生偶遺額外不得一望廩增殊爲可憫且各學虛廩尚多不贍諸生更復何用本院深念寒苦設法疏通其考居三等前列者酌量給賞准附二等之後挨次幫補或亦憐材稱餽之一端也但須聽本院臨案裁定毋得一槩濶擾自取

厭薄以負作興之意

又

照得歲貢舊例必屢經科舉者方許起送但邊方科舉數窄一誤三年有終身食廩而不得貢者前院間有通融終未畫一今議歲考曾經三四次考居一二等者雖未觀場始准笑科舉一次起送或亦拔淹優老之一端也其未及三次者不准

又

照得衣巾舊例必青衣考復者方許查給但寒儒末路日暮途窮自揣荒疎亟求引退似與冒昧頑鈍者

不同查無過犯姑准衣巾終身照例優免或亦獎恬恤苦之一端也但須未考預呈若發案之後已經斥革者不准

禁約

爲禁約事照得國之大事在戎兵之大命在食方今邊陲多事卒伍少糧勞瘁倍常困窮可憫所賴諸將領加意撫恤與同甘苦感恩用命惟爾之功如有沿襲獎規尅減糧餉者許軍士據實首告或本院別有訪聞重則叅題輕則究革大閱在邇功罪昭然三尺無私決不姑息

關防

爲關防事照得本院原藉江南距塞北三千餘里家世業儒素性寡合並無子弟在外遠遊亦無星相從前熟識如有棍徒探知來歷假借名色有所營求卽係詐僞仰該地方擒拏送官究遣阿縱不舉訪出連坐不貸

門牌

一本院崇奉

憲綱兼司文命矧當大比大閱

尤矢極慎極公且兵饗各有成案官箴自有公評文章原有定價三尺具在一毫難欺至于招

移試卷本院親手裁決虚心品衡並不旁落吏書曲徇津要如有不安義命不遵憲規鑽刺打點者自取罪戾毋貽後悔

一本院素甘淡泊最厭繁華取給幾何供應易辦俱委官發價置簿現銀平買並不虧擾行戶如有勒取措欠者許被害不時稟告其出巡經過中火止備一點住宿坐飯無過五肴吐棄有餘糜費無益有驛州縣不許重送下程小飯徒滋煩擾違者提吏究治

一本院職司彰瘴義切惻痍一切地方利病民生休戚未能洞悉實所願聞凡官吏軍民鄉耆人等果有真知確見不妨據實陳說以憑裁酌施行至于巡歷所臨嫌疑宜遠凡有書帖不許稟投縉紳勿枉先施事畢自當踵謝其經過使客隨時擊鼓傳報悞者查究

一每日辰時開門回風吏領牌簿收薪水放投文門吏預將投到公文置簿掛號詳驗件數開寫明白另具小帖隨牌呈遞唱名查收應見官員總具面帖先呈依次稟見申時先領文後解審畢繳牌簿如有邊警京報督撫會稿隨時擊鼓

傳進放告日期照舊履行

驗具商舖大生公及市報式局次均均均均
 而日具小計計計計計計計計計計計計計
 門或所所所所所所所所所所所所所所
 一發日具報報報報報報報報報報報報
 商舖學校學校學校學校學校學校學校

十四終



